

四庫全書

集部

欽定四庫全書

吳文正集卷八十一

元 吳澄 撰

墓誌銘

故樊居士墓誌銘

樊氏洪進賢著姓居士諱士高字叔厚世居崇禮鄉之三陽里宋紹興初盜據江城侵及洪境樊昌時率民兵拒戰而死事定贈脩職郎自是族浸昌大脩職五傳至

秀英由三陽里徙居北山以其地沃物繁於生聚宜故居士其仲子也生宋寶祐癸丑十月饒智畧涉經史少時已為季父饒州法曹夢辰從兄興國戶曹必薦所罷至元丙子以後戶役繁重與一兄二弟佐父理家獨勞不怨父歿養母益虔及將異居以先廬讓伯氏鄉先生胡簿霆桂學行深峻於人少許可每稱居士有父風其事兄如事父兄既喪友愛二弟尤篤不汲汲殖貨而家日以裕見人銖較尺絜輒心非之晚年資產倍於初遇

耕牧賤夫相與爾汝度量寬洪無疾言遽色喜愠不形而家衆畏慄惟恐過差惠周黨閭不望其報信孚朋友必顧其言鄉瀕湖濬厥田下下多滯屢歎有司驗視必為開陳民瘼以拯饑溺或勸之仕則曰是有命焉不可幸致恬然無一毫外慕意處伯仲叔三子各有攸當馬塘去家二里許樂其平曠挾季子往營新宅而終焉一日召諸子來前曰吾年已七十三得從先人蔭地下復何憾越二日不病而逝泰定乙丑閏正月十二日也初居

士未昏有陶司法應罷寓邑東為孫女擇對甚嚴聞居士賢妻之留甥館再閱月以定省不可曠而歸陶氏先三十二年卒繼趙氏子男四志泰後伯兄亦先卒志務志廣志能女三孫男七女五居士昔於所居東南五里之青山豫卜壽藏諸孤從遺命以丙寅十月壬午葬塋徐芳遠為志務來請銘予觀居士蓋循理安公有福德人也宜銘述其行者將仕郎南豐州判官葛潤玉銘曰

不求聞天所敦亡若存徵予文

貴溪翁十朋故妻李氏墓誌銘

前鄉貢進士翁仁實母喪未畢凶服造門再拜請曰先妣李氏有賢行年僅六十而終仁實不子生弗克厚養死弗克厚葬罪大無以自容葬有日敢乞哀矜而賜之銘庶先德託以永久進而與之談知為至治癸亥所貢士次年試禮部不第特恩命長信州路象山書院才可
得仕而歐然不以己能自足亦其漸習賢母之訓而然

與問其母之行曰生未暮失所怙既亂失所恃鞠於姑氏姑適徐而娶治家嚴肅教姪如其女及年二十一以歸我家君婦道謹飭靡違夫出則總家政治生業舉無曠廢家君嘗語諸子謂家之粗立而母力也服用素簡飲食必均每不喜人子別饌私奉以為寧如郭林宗無如茅容或疑其言識者曰自子言之則未孝自母言之則賢也又嘗歎美程子孀婦餓死事小失節事大之語因言人或餓而死亦庸情拙於謀生故爾吾親見

徐氏姑熒熒提孤嬰能復侵疆數十里內賴為惠主里
有何氏甚貧早寡無子植麻苧畜雞豚以給衣食年踰
七十怡怡如小兒由二人觀之守節者豈至餓死哉同
產惟一兄而殤囑從兄以一子後之為築居納室畀田
俾供時祀從弟沾疾而子缺於養養之餘三十年有外
親平日視猶姊如乳而不能具食備襁褓膳羞以遺其
後既寡而殂力疾冒暑往哭諸子請代行不可曰彼之
孤長者未冠少者猶抱死未有以歆竟親往致禭而還

家雖無贏有死亡不能喪葬孤遺不能嫁娶困厄不能
存活者周恤罔吝凡種德急義之事相家君力為之弋
人捕生禽來鬻買而縱之山中劬勞至老不倦子婦嫜
黨或勸少休曰人恃勤以生未死以前非可間之時也
諸子篤學勿怠不正之書不許接於耳日常命誦孝友
諸傳集室衆侍聽下逮使令皆繩以法式子男四仁實
長次尚志集義與實女一能暗誦古書詩文以妻趙元
略延祐戊午年二十四先卒孫男四愛愷雅正孫女一

字外孫如孫曰俟而父繼室而歸予聞仁實之言其母之德頗有與吾母同者其年又與吾之季妹同而吾母沒已二十九年吾妹沒亦四十年矣思其德其年之同而動予哀銘以遣之李氏諱如韞泰定二年乙丑六月六日卒三年丙寅十二月某日窆于其里之鳳山銘曰母也誠賢子其永肩以成以全

故逸士陳君雲夫墓誌銘

學者魯仁任南康路建昌州學官命其子以州人陳德

剛來請銘其父雲夫之墓雲夫諱士龍閩中官族王考
紳始徙建昌考伯順儉勤殖貨產生男九人皆魁偉遂
號望族姓甲於一州雲夫之次在九之四生宋咸淳己
巳六月癸卯居家孝友奉身澹泊唯祀先饌賓致其豐
備葬嫺黨之弗克葬者撫其孤遺使之成立或罹非辜
援之不惜力儲粟賑饑平糶外所費甚溥衆謂宜度其
能償與否則曰吾以周急也豈繼富哉奚暇豫計它日
事然人亦自不忍負尤貧者亦不責其必償也雖與己

忤有善必揚雖與己合有過必規不阿貴盛不陵寡弱
不恃己長而短人不以喜怒而有所予奪擇士傳其子
唯謹傅病疫危篤家老請舁送不可躬督諸子侍粥藥
更數醫治療竟不起哭之哀襚襯而歸葬之贈卹甚至
咸稱忠厚長者云泰定乙丑正月甲午得疾終年五十
七妣楊氏先二十年卒繼趙亦先四年卒子男四德剛德
大德裕德輔女四長適熊餘未行孫男二女一某年月
日葬某原方彊壯時人勸之仕應曰仕以行志也下者

為貧耳吾幸衣食足以自給苟志不可行役於人奚益
里人鄭時中狀其行曰不趨利而急義不慕名而務實
持古道而不變於今其信矣乎銘曰有以承先有以遺
後奉已則薄待人則厚胡優其德而劣於壽我銘幽宮
昭示永久

故處士薛君墓誌銘

春秋時薛視諸國為先封子孫以國為氏至唐逾盛河
東之薛在宋秉義郎殿前都校尉習者處士其後也處

士諱勉字方叔世居信貴溪之仙浦里曾大父子徹迪
功卽知恩州南丹縣兼主管勸農公事大父瑒太學進
士父亨靜一居士世以文獻自持與臨川之陸鄱陽之
湯弋陽之謝諸名人交際往還母王氏有婦德族方隆
而宋祚訖民頑弗靖推官軍躡蹠由是鄉里凋敝而薛
族之資產浸浸淪喪衆咸戚惋獨處士恬不介意諉成
毀興衰於數不以貧賤渝其樂天稟純粹正直待卑屬
必端肅見小人無嚴毅既不失我亦不迂物嘗遠遊荆

湖廣海間雖沿邊溪洞亦至倦而東歸仙浦之南六七里曰宜陽方山後擁諸峯前羅明水縈抱如玦喜其地遂徙居焉扁其堂曰寶善予嘗為之銘配孔氏勤儉慈順子二人玄義從開府張公隱老氏教中質淑學篤作詩清新不羣文士競與為友制授弘文裕德崇仁法師充大都崇真萬壽宮貳職璽書游命長官觀非其好也玄儀朴雅溫文田州路儒學正兄弟怡怡奉親而處士君卒矣泰定丙寅四月望日也享年六十有八法師在京

素相親厚予既告老家居總服來過曰吾父不幸以病終玄義弗克予大懼吾父之美泯泯不傳斬一言刻諸墓石予於處士因其子而知其父之賢不辭而為之銘銘曰聚襲其錦恬處約銘最其畧潛亦灼

金谿吳德勤墓誌銘

金谿吳塘之吳其居東溪居新田者派之分也安遠令惟新之子處禮又自東溪分居桂田早世配葛氏善持家貨業日贏長其孤天桂納余氏為婦甫能應門而官

有海舟之役竟勞瘁以歿二嫠然獨處乃請於新田之族擇宋咸淳辛未進士永豐縣尉名楊之少子恩為後恩字德勤生永豐官所元至元壬午為後於桂田未三年有余氏喪又數年又葛氏喪畢二喪嫁天桂二女人稱能子娶曾繼周男女凡六長子舉從子學至治癸亥子守官禁林是年冬舉亦來京師泰定甲子補學弟子貢明年乙丑冬歸省父母喜子之至又明年丙寅春父病夏五月己酉卒年五十四又明年丁卯春二月某日

葬其鄉之福林舉衰經造吾門乞銘其葬余因舉素知其父純厚為鄉之善人許之銘而語之曰必也正名乎蓋以昭穆世次恩宜為處禮之子而以舉之弟安為天桂之子則正名而言順矣夫君子之必可言也若名之不正予惡乎銘諸子舉安寧康女二長適鄧次幼未行孫男二璧欽孫女亦二銘曰嗟哉若人雖不壽其身而有子以壽其家抑又何嗟

故平洲居士劉士遠墓誌銘

撫之縣五樂安最後置樂安之鄉四吉永豐割其一求
隸雲蓋是也雲蓋鄉占縣上游雖隸撫而吉之流俗固
存地產之美饒戶口之蕃庶士氣之英特世家之盛大
萃然出三鄉之表竹園劉氏鄉之右族族之人無不挺
挺自拔卓卓自立其間恂恂儒雅肫肫仁厚如麟如鳳
則有雲伯焉雲伯生士遠名辰翁才子也南土新附遐
僻未靖時士遠猶少已克相父弭折亂萌鎮護居里遠
近等賴其庇長而應門一遵父轍賑凶荒活饑孱捐已

所有息人之爭貧族昏喪必致補助久假負欠復來告
急周恤不靳曰彼以貧故償不及時爾豈負我哉歲供
公役未嘗剝下以奉上比閭絕叫囂隳突之撓民有
小忿平之不令至官府賓客過從禮意歡洽或勸充廣
田宅則曰子孫保此足矣族中有子無力延師每竊喟
嘆擬建義塾收聚以教恬靜寡欲好義樂施謙謹和易
與物無競事親事長略靡逆忤侍疾頃刻弗離持喪始
末如一家有水竹之勝廬陵劉太傅嘗為書平洲二字

扁于樓人稱平洲居士云娶李先七年卒子楚蘭女適
王適李孫曰丁曰德曰瓊女孫五皆得所歸泰定乙丑
十一月終年五十八丁卯秋葬龍石之原楚蘭請銘墓
石予素聞士遠家世之善可銘已而其子方務學崇立
身之孝是以不卻其請銘曰
而續而似而務根柢而遷而迤而可涯矣

故逸士高周佐墓誌銘

予家距吉永豐不二百里聲相聞跡相及也華田之高

為邑著姓有諱師文字周佐者家業隆盛卓爾樹立名聞尤表表年四十四而終與其友鄉貢進士解觀訣無它語囑以求余銘墓為第一事卒之三月其孤世安撫其所見於家庭所聞於師友者輯為行述解貢士將之以來其言曰吾父機警敏悟雖孩孺如成人讀誦三兩過即記憶不忘無雜嗜好或遺之珍玩僅一寓目竟不畱戀乘暇維喜觀書大父厯覽四方吾父猶未冠已承委意專任家督外而公私之酬酢內而出納之齊量蠲

集鱗次處之綽然逮既冠亦事遠游往復京師再三語人曰吾幸六合混一時獲覩版圖之廣大宮闕之雄麗人物之阜蕃山川之奇勝足矣又何數數僕僕道途間為乃定閒居之計起樓度圖籍趙承旨孟頫為作藏書二字扁其顏既而過客日衆舊宅地狹改築于杜林側時曾大父年踰九十大父亦且七十新中堂奉重親致樂以養東西之樓館則以貯書焉以禮賓焉父之父兄行有薄鄉邑者有薄嚴道者有巡警傳羅石灣者吾父獨

安於隱退勸之仕輒不應精神標格俊拔秀偉美髯豐
頤眉目如畫瞻之知為英特接引於人一見如故發笑
傾倒略無厓岸吟域居縮水陸之會臨蒞之官經過之
使與夫來往之朋游朝夕迎送無少懈所當資贍靡不
滿意去每仗大義不吝浮費而根本益充肥生殖益饒
裕蓋非私智計較所能得兄死扶植從子父喪撫恤幼
弟延師儒淑循曹俾可應時需水阻造舟梁以濟歲饑
發陳腐以糴排難解紛赴人之急甚於拯己之焚溺人

以月庭稱若其字云志未大展而遽棄諸孤痛哉諱致
平者吾父之大考也諱應新者吾父之考也吾母鍾氏
三男二女男世安長世用世康吾弟也世用先逝女適
黃者吾女兄也許適鍾者吾女弟也吾之子奇孫女子
子一吾亡弟女子子一吾父見孫者三矣終於至順辛
未十有一月丁丑某鄉某里某原者葬之宅也某年某
月某日者葬之期也余閱所述踟躕久之嗚呼吉士固
多奇周佐生而有以鎮于家有以望于鄉歿而斬有以

光于世才識兩不凡已夫於是為之銘銘曰

羸於財嗇於壽天也莫究斯順所受先而潛後而炎人
也可占其符所覘

故西峯居士裘府君墓誌銘

裘氏先世自會稽徙豫章之西山宋淳熙丁未進士萬
頃由大理司直為江南西路安撫司幹官贈通直郎弟
萬全以通直之介子由庚嗣擢寶慶丙戌進士終饒州
德興簿德興生希彭郴守曹一龍妻以弟之女居士其


後也居士諱興仁字克榮負氣不羈頗碩美髯從曹夫
人之兄都昌尉盛用學德興之弟朝散大夫安撫司參
議應材之期之為興家子革命後西昌有賢令甚相好
比還朝有意薦拔當路亦相推輓居士惟日廣田宅絕
仕進想年未六十屏家務畀諸子闢家塾誨諸孫所居
之西有山曰安峯峻秀不羣行省平章史弼寫西峯二
字作堂扁因以自號幅巾藜杖尚羊泉石揭格言明訓
于坐右朝夕諷翫自娛且自勉也內無畛域外不襍襮

理家御衆和而有威嚴而有恩睦族姻賙故舊禮稱其情接物唯恐傷之或有未善面規忠告脫人於險終不自得歲祲出粟以賑平直以糶貧而病死施藥施視貸弗克償者焚其券事曹夫人至孝塋在安峯之麓荆庵捨田招方外之人掌歲時展省事嘗曰樂哉斯邱吾母葬於斯吾妻祔於斯吾終其亦藏於斯也至治壬戌自營壽藏年耆色孺神爽不衰泰定丙寅十月疾卻藥不服旬餘晨興衣冠謁先祠坐于堂子孫列侍笑語如常

逮夜命子孫曰吾其終矣端坐至翼旦雞鳴而逝是月
廿九日庚午也其生在宋寶祐癸丑六月十六日癸亥
歷春秋七十四娶同邑萬貢士兄女有婦德先十七年
卒子男四義高前都省宣使義大樂平州儒學教授義
忠未仕義正先歿女一適同邑熊孫男十一女八曾孫
男一女二明年丁卯十一月八日壬申寔于所營壽藏
義高兄弟遣使致書求銘予觀裴氏世以儒科顯而居
士之子若孫又才且賢然則一身之隱處益不盡其用

而留以遺後人歟銘曰

前有世科後有時彥獨立于中綢錦不見積深閱久發
也必閼裘氏其昌疇將與京



吳文正集卷八十一

欽定四庫全書

集部

吳文正集卷八十二至
四

御史^臣邱文煊覆勘

武英殿纂修侍讀^臣陳嗣龍

欽定四庫全書

吳文正集卷八十二

元 吳澄 撰

墓誌銘

故桂溪逸士陳君墓碣銘

宋末科舉之學甚盛國亡科罷而業之者亦廢樂安陳
貴道守其故業以自娛嬉不以時所不用而怠皇元延
祐儒科復于時舊學者已忘其步武新學者未得其門

庭而君獨擅所長年雖老猶挾其藝一再試有司遇不
遇有命而君之先識定見莫不嘆服焉貴道君之字仕
貴其名也居樂安縣西之二十里世裕資產逮其祖其
父益昌大君生長富家志趣不俗種學績文是務於親
於兄於弟於族以孝恭友睦稱交朋信待衆仁藹然君
子長者之遺風實孚譽達鄉人士師尊之邑大夫禮敬
之憲僉蔣侯行部至邑見君甚歡出所作詩詞與共商
畧邑校缺官當路以君攝職前時君之弟崇進新構講

堂君又新構禮殿衆口頌美既而君復歸舊隱先世嘗
創道山書塾屏帷列岫襟帶清流占地之勝名公題詠
不一君讀書其中夜參半誦聲猶未歇老而彌勵至治
癸亥感微疾正月十二日卒享年七十八娶方氏子男
四文鳳文麒文璘文慶女四適師適張適鄭適何孫男
八女七泰定乙丑正月二十八日諸孤奉柩葬于所居
之西下陂之山其冬予還自禁林明年文璘請文墓石
予與君素厚善思篤學篤行如君者不可見已乃叙其

槩而繫之以銘桂溪者君別墅之扁也銘曰
恂恂耆舊展也希有隆隆邱阜噫其可久

金谿劉君妻吳氏墓誌銘

危素以其學子劉蘭見傳其大父之命其言曰吾母新
田吳氏諱卿吉宋貢士可之子賦質溫淑治家儉勤中
外無間言外祖母卒既葬諸舅欲以篋笥所貯金帛分
與女兄弟諸女中吾母次居四艷然曰女出嫁在外母
病不得晨夕侍側奉湯藥抱痛終天矣身後又攫取所

有是利母之死於心忍乎弗受大德乙巳秋外祖父罹
無妄之災吾母憤曰恨我非男不能詣官代父明曲直
勉吾父捐資佐諸舅訴于上司遂白其屈吾父歿時吾
母未五十畢男女昏嫁之未畢者教之名使成立家日
以豐受子孫致樂之養年七十六乃終至順庚午三月
五日也卜宅兆于岳溪將以某月日窆敢徵一言光泉
壤予與其夫家無一日之舊危素丁寧述其子之情乃
為之銘其夫劉國珍也子男三介福象賢有容女三適

荀適鄧適趙孫男九女四曾孫男三蘭其長也銘曰
富且壽繁亂胄德可稱福亦厚

故陳山長妻姜氏墓銘

故浮梁州長蕪書院山長陳君之配姜氏年八十一無
疾而終越四年其壻金谿吳晉卿諗予曰妻母三子長
曰偉建寧路崇安縣星村鎮巡檢仲曰紳將仕郎瑞州
蒙山銀冶提舉季曰經由平江路長洲縣教諭改儒學
正長子先二年卒季子先三月卒仲子獨治喪事其從

北桂陽路儒學正學為叙其母之行方將求誌銘以葬而紳亦卒諸孫惟鈞既壯既室其餘俱幼晉卿承妻兄之志敢斬一言光幽宮子閱學所叙夫人世居饒安仁之瑣塘歸為陳氏婦奉舅姑無違娣姒未嘗有間言山長君負意氣少宦學徧游諸先進之門晚值時難能排紛禦侮於談笑間不屑治貲產得內助力生殖有經家業彌裕勤女工至老不倦饑寒不給者隨所有濟之能償不能償不較也三子皆有立諸女亦克如其母婚嫁費

繁辦之不勞力晚受子孫孝養閭里羨其享盛福其歿
泰定二年十月六日也男三女亦三適張適上官吳李壻也
孫男五女五曾孫男一女二某年月日葬某處銘曰
壽且豐孫承宗用康厥終允臧斯封

故金谿毛秀實妻陳氏墓銘

鄱陽陳氏女惠安生宋寶祐甲寅九月年未二十歸撫
金谿為毛秀實妻奉夫之妾母如君姑元至元丙子家
燬于兵器服鮮遺掇拾燼餘日積月累賓祭靡缺供上

所羸猶能增廣田園廬舍生殖浸浸饒裕延祐甲寅夫
喪斂葬如禮時君舅進武校尉之喪猶在殯曰予既卒
且葬矣茲宜緩適卜宅安厝畢其夫未畢之事居常
不忘敬順未嘗鮮衣美食戒其子繼芳暨翼曰吾相爾
父興家於艱危本之以勤苦將之以節儉以有今日爾
其念哉侈用則傷財傷財則窶矜氣則逆衆逆衆則爭
爾其慎哉已為所生子蔣之子繼芳是也蓋曰毛文王
之昭蔣周公之亂二氏實一姓也年四十餘復屬其夫

以妾勝生男二其一不育其一翼也待二子與已出無
間命翼從前進士盱江李先生受學泰定丙寅春得疾
明年丁卯夏小愈明年戊辰春又劇五月丙戌卒年七
十五其冬翼來乞銘余病不能作辭之天歷己巳春溫
前請將以某月日寔于某原予觀毛母戒子之言雖士
大夫或有所不及蓋賢母也乃為銘曰
母教兢兢子孝承承毛氏其興乎

故登仕吳君夫人余氏墓誌銘

宋登仕郎吳時可撫金谿著姓咸淳間暨其季弟與郢
程鉅夫共學臨汝書院余鉅夫友也亦時造焉遂識君
仲季未幾連代革鉅夫顯宦于朝時可隱處于家恂恂
然有古逸民遺風食皇元之士踰三十載乃卒鉅夫為
銘墓又垂二十載而其夫人卒諸孤徵銘於余夫人余
氏諱妙真金谿禮原之系曾大父忠全大父延明父世
覺俱潛晦弗耀景定庚申歸為吳氏婦順舅姑睦娣姒
厚宗戚下逮使令咸得其心女事婦功躬不憚勞相其

夫終二親喪無違禮登仕君晚嬰末疾足不良于行者
八年湯藥飲食之奉纖悉具宜比及卒葬凡附棺内外
必誠必信老年獨受子孫孝養燕居談論每勸以勤學
謹行持身理家之道既壽且寧福稱其德元至治癸亥
某月某日無疾而逝年八十二泰定甲子某月某日葬
某里之延福原子男五厘子辰子良子復子萊子其一
其四先卒女三孫男十女十三曾孫男五女五予觀家
之盛衰寔闕内助之賢以否吳氏自宋至今弗替益隆

非其所積者厚所詒者遠而然哉銘曰

福集家昌靡不繇內則壽永身康靡不繇順德胄胤振
振一門其如春堂防囹圄百世其如新

故吉水縣尉楊君墓誌銘

國朝一天下以來民志靡定塗之人輒欲躋身大夫士
窮智慮竭貨力雖不可得而猶不止幸而得之如行可
際可公養無一可而甘心焉鞅掌盡瘁脂韋忍詬雖不
可為而猶不悔余壹不知其奚慕吉水縣尉楊君家清

江縣之清江鎮鎮綰西江東廣之會貨物聚戶口蕃大
兵南下時未及郡竟官吏已逋竄居民失依倚惡黨乘
時將魚肉其鄉鄰君見事明投機敏合數大家首詣帥
府輸款順附一鎮之人大得以安小得以全更生者不
啻百千萬帥府嘉其誠上其功朝命授吉水縣尉甚能
其官然不俟滿而歸年方壯盛閒適四十餘年以至于
老無復萌仕進想人問之則曰吾先廬先疇自可容膝
餬口以怡吾親胡能役役為人也哉噫君之一命分所

宜有非如它人之以智慮貨力取猶且薄之而不處何
其識超之超乎衆也昔者范蠡既成功名於越思移謀
國之術而施之於家謂陶之地宜貿遷遂徙家箸鬻竟以
饒財雄一世清江鎮亦江右之陶也五方俊民間陶朱
公之風而興者前後輻湊至往往能有所立故鎮人每
由客寓而老子長孫其間土著蓋無幾獨楊氏為世族
家近於市而身遠於賈雖廛地分僦于編戶厚生利用不
過歲收其土之入而他無所通阜坐視輩儔納倍蓰之

息累鉅萬之積畧不動其心噫聖門如子貢猶未免於殖貨君其賢也已烏有晨夕羊鼎之旁而不一染指者乎何其識超之超乎衆也宜春易貢士景升於君有三世之好而述其行曰君身長七尺望之偉然魁碩軒岸重厚和易輯睦間并解釋紛競直辭正色使人心服鄉有水患率丁壯築陂堰十餘里護淤田數千百畝為膏腴歲饑隨廩實多寡以賑善大字樂為人作名扁所居水竹幽靚庭階雜蒔花卉種梅數百株紆環如谷人

號之為梅谷云泰定丁卯正月微疾子弟親友咸在君
端坐曰吾年至此吾欣然逝矣季旬八日也壽七十六
曾大父有貴大父法顯父與祖晦迹弗耀君諱三登字
儀之少業進士詩賦藏書數百卷昆弟三人俱文雅訓
勵諸子唯謹娶王氏男以義以道以德女適胡適張適
彭孫世昌將以某年月日葬某原君所自卜也卒之四
月予客上湖黃氏之塾以義黃倩也衣大布之衣來乞
銘其婦翁黃良孫謂予曰儀之之行可銘也乃為銘曰

不惡辱以榮不惡罵以羸人之同情彼林林而醒此子
子而醒噫其可稱

故蒼山居士徐君墓銘

余昔由撫而洪由洪而撫每過金溪城泊舟岸下屢欲
登岸一覽而輒不果蓋撫建之水自南遶其東而北流
又分一派遶其西而合于北山林可樵原陸可耕而水
環其外若海中洲島然地屬撫郡臨川縣之明賢鄉舟
人云某姓某姓居其間今不復能至其處矣有徐居士

子孫來乞銘以葬問其居曰金谿城也問其族曰先世
自洪之豐城徙居士君諱天麒字麟卿生宋寶祐甲寅
仲冬季旬之二日卒元泰定丙寅孟冬上旬之六日得
年七十三至天曆己巳季冬仲旬之四日葬長樂鄉之
塔坑居士處有恒產出可通舟薦歷江淮湖湘賀遷所
貯家浸以肥多接豪俠偉人故襟抱識趣不鄙不凡南
服歸國徵役難任率至疲瘁獨綽綽應之竟莫能害而
尤加裕焉近境竊發設計平殄不煩官軍黨里蒙惠賙

賑匱急負者弗責二教之徒勦助亦欣然樂施達官嘗
書蒼山二字而扁其宴息之樓鄰善家富身康心寧優
游長年以壽令終子孫才賢興盛未艾真福德人哉考
文先妣蕭氏娶白早世無嗣再娶陳氏先卒子男四景
仁景瑞景輝景昭瑞陳出也女二梅次鼎封巢壻也孫
男十曰彥曰彥曰誼曰啟曰文曰成曰馬曰虎曰智曰
黑女五曰武曰琇曰祉曰祐曰玉為請銘者鄔迪景瑞
之妻弟而吾孫婦之族父也銘曰

肥遯皎皎人間瀛嶠生崇吉德死妥吉兆

有元忠顯校尉富川縣尹皮府君墓誌銘

府君諱南舉字仲尹姓皮氏系本長沙醴陵徙新塗西
歸里分徙清江崇學鄉今為崇學人族以業進士舉貢
者不一至宣教郎諱翼登上第知平江縣繇是聲望彌
光府君平江第二子也幼從父游宦其伯兄留任家督
父既歿聚處協理兄所可弟然之弟所可兄然之雍睦
無間鄉族鮮二早歲俱從碩師受周禮義兄嗣家學相

先後貢于鄉同試禮部弗利國朝奄有南土豫章已附
游兵駸駸及清江皮姓介居二郡之間官民靡所倚藉
僉謂宜得望族有才畧者出應事機府君完保宗黨于
家衆推伯兄往詣帥府輸款境內遂安堵如故事定朝
命授伯兄嘉議大夫南雄路總管授府君忠顯校尉管
軍總把湖廣行省命充賀州富川縣尹府君素志恬淡
隱退不仕俗塵畧無芥蒂尊酒棋枰藥爐丹竈逍遙閒
散如方外人然譽聞日隆過從雲合接賓朋有禮賙鄰

曲有恩遠近視如泰山喬嶽焉夫人清江縣尉胡蒙冲
女生子豫晚歲病癘年七十七子喪憂悸病劇既而復
愈年八十二危篤幾甚忽矍然而甦自是又五年八十
六乃終女八人壻二胡一趙一黃二鄒一劉一鄧孫男
一植女二適楊適趙曾孫男二女二皆幼余昔年屢客
皮氏總管公暨府君親密如膠漆府君卒後九年余再
過清江而府君之柩猶在淺土植以總管公之子平江
州判官潛之狀請銘其大父之葬余於府君情誼非止

如舊館人而已追想其風流不可復見則為之銘曰
質也清仙之臞氣也初春之煦人也外冰之渙天也內澍
之濯德臻茲其壽也宜

樂安胡仲玉墓誌銘

樂安胡仲玉諱諱宋咸淳丙寅四月戊子生元泰定丁
卯四月壬午卒是年九月乙卯葬縣北二十里康村之
大朱谷前期孤孫恭衰經請曰先君善事父母承順養志
服勞竭力敬兄友弟夫婦如賓應接允當明習吏牘通

敏過人強壯時在官方愜志忽自引退曰此非吾業也
閒居植產勤而有恒儉而中節日豐饒汲汲以教子為
務又推所餘濟閭井之貧衣寒粒饑藥病棺死以至梁
川甃途施財于二教靡有吝意孝弟慈厚出乎本然而
非黽勉也今也不幸大故儻得達者一言光于幽則死
者為不亡矣敢以請予家距樂安甚邇人之善否固所
熟知而恭勸書博記屢應進士舉嘗及予門者仲玉去
吏為民竟能致富其財益足稱也祖諱潛考諱祐之一

兄二弟娶鄒男三良恭讓女一孫男二惠溥女孫亦二
銘曰孟子有云術不可不慎也斯人庶幾能擇術者夫
家裕而子賢宜哉

故南城楊泰可墓誌銘

右南城縣之南八十里有聚曰裏塔楊氏族居焉族無
貴顯之人無富豪之家而風俗敦樸好善先世有諱宏
者嘗暮行入郛度郛外長橋橋有遺篋命僕人攜歸館
舍啟視內貯白金二百兩翌日天未明往俟橋間果有

號而至者曰昨領官降和糴銀本適醉於此而忘持令
雖傾家莫償儻索不獲唯有死爾宏察其言覈其情哀
於是呼之造所館出篋授之其人泣感而去由是鄉人
稱為扶

念善翁翁之仍孫亨字泰可祖考妣考妣四喪俱未就
土悉心竭力卜占宅求良師詳審安厝唯恐弗慎後享
年六十九而終其子素不相識詣予求銘謂葬期擬今
冬余未暇作則冬仲又至必欲得銘謂葬期展來春鳴

呼昔者其父之葬親也必待己之諳葬法今也其子之葬親也必待人之與銘文否則寧未葬揆之中道固或未合而致孝於親必誠必信可謂厚也已矣缺

泰可德不許和不流天姓孝友養生送死無憾以禮開導族屬俾不失尊卑序理家儉勤綱條整然力匪有餘每喜賑施見貧輒感額若已疾痛道路阻隘不便亦為脩治宋寶祐戊午十一月生元泰定丙寅三月得疾弗起娶宜黃饒子男三乍平本平為兄炎嗣女適新城

鄭孫男六女三俱幼兩及吾門者季子本也墓地在南
豐小嶺下茶坑白石之原銘曰

偷俗靡靡苟簡喪紀訖事而已奚念所始必安親體必章
親美嗚呼楊氏有是父子

故臨川鄭君宏叔墓誌銘

唐僕射鄭畋之子戶部侍郎凝績葬建昌新城縣北三
十里子孫因家焉今為鄭氏族臨川之楊塘清泥池頭
浮田四派其分流也宏叔諱居誼居楊塘宋末寓清泥

與一二宋人文學相好咸淳甲戌混補入大學者名翔
貧無資君給送其往在學未幾事變孔棘奔避而出道
梗不通適解后君於江東之境相挈至家時人情震蕩
君與大學兄弟力護鄉閭鎮遏羣不逞幸而無虞得以
生聚其間小定乃歸楊塘故里貢舉已廢君教子明經
不輟或笑其迂及儒科復而君之子孫克副時需始服
君遠識母年逾八袞子職謹甚伯季凡四同居五十年
雍睦如一日公私應接長者分畫少者稟承罔不恪恭

處鄉恂恂嘉善嫉惡間出片言平釋忿怨悲愜所願有
喪無以斂葬周助唯恐後晚年創僧道寺觀各一施田
以飯其徒欲建書塾待游士未果而疾革猶以成志囑
子孫生宋淳祐庚戌元泰定丙寅九月卒娶黃氏子男
一雷一中一鶚嘗任江浙御米稻田提舉女適楊適曾
適龍適楊孫男五女七四已行三未葬曾孫男四女一
卒之年十一月寔于金谿歸德鄉之上磔前期一雷命
其弟一鶚以前鄉貢進士程祿應所述行實來乞銘余

觀其行蓋鄉之善士也是可銘己銘曰

視久生厚五福具有本培末茂韞美未售躬之弗邁式顯之後

陳垚葬誌

陳垚生長素封之家而無膏粱紈綺之態既成童詣予所讀書予每日談辯從旁竊聽悲能悟解退而與同輩共論雖年在其上者輒為之屈予固異之父亦喜之泰定丁卯夏予出訪清江舊友世從及秋父促之歸將為

畢娶其意殊不欲予與言曰父命安可違遂歸而娶明年復過余三月望歸省竟以內疽之疾不可救而殂四月十日也父母哀之予亦哀之以予文誌葬蓋其父母意也聊藉是紓哀焉爾矣噫程子謂有生之類間值者難難則數或不能長壽之慧而夭也殆以是與其生至大庚戌九月十九日年十九已冠已昏故不為殤冠之時字曰伯高婦吳氏卒之後五月二十二日生一女噫

吳文正集卷八十二

欽定四庫全書

吳文正集卷八十三

元 吳澄 撰

墓誌銘

故居士康君祥可墓誌銘

丁卯

江西之郡吉為最其最者何也文士之秀偉富戶之雄
盛俱非它郡所能敵也其文士也漁獵異書以逞其博
追琢瑰辭以銜其巧如山岳嶙峋如波濤洶涌如秋空

鷹隼如春園花卉或豪健豐贍或清竒俊逸或詆譎詭
怪或妍媚蔚紆卑卑者不敢仰視然求其淵淵如海溫
溫如玉恂恂如孔子之處鄉黨謙謙如顏子之有若無
實若虛者蓋不多見其富戶也精神振發氣馘赫奕伯
仲公侯而與臺府史伐蛟搏虎吞象食牛弛張闔閭無
施不可大率襲翁伯季良之餘風倘不若是則相與嗤
議其選悞骯骯有能不為習俗所移者幾何人哉若太
和深溪之康庶乎不移於習俗者也康居士諱瑞孫字

祥可先世自祁州徙家足恒產迨南服土疆既屬國朝
其大父若父相繼充拓浸浸與擬封君者齊而秉心無
競橫逆弗校卒能使之自屈未嘗有一事溷公府男女
長穉會食秩秩如古禮法之家至居士三葉遵守靡渝
居士幼已卓犖見者心瞿少長佐其父致養盡歡大父
景明至元己丑年六十八而終大母郭氏延祐乙卯年
九十七而終父國俊受養三十年終延祐戊午年七十
六惟母劉氏夙喪戚戚常懷罔極之報事繼母羅郭與

因母同一兄一弟不壽恭承父命教育孤遺一如己子
叔父年八袞尊奉罔違女兄之夫託處白于親庭給以
田宅至于今得所妻兄子立無依為寔其五六喪館穀
之終身日與共飯孝友睦婣之行隆於內外者如此嗜
書如飴尤喜讀史論已往成敗得失如身與其間泰定
丁卯秋攜孫出省稻畦訓之曰詩書禮義固當熟稼穡
艱難亦當知越五日晨興理櫛家政如常俄入卧內無
疾而逝閏九月二十日也得年六十娶羅氏先卒子男

元愷孫男宗武孫女許適劉曾孫男舉曾孫女一卒之
明年春元愷遣宗武來乞銘以葬余適未暇辭之孟夏
又至乃進宗武而問焉獲聞居士梗槩噫貨力之家孰
不頡頏騁騫以市聲勢習俗則然獨居士退若不盈固
其資識之超抑亦默符於柱史之意乎是可銘已其友
顏觀生述其行曰居士昂藏玉立束帶十圍白髯蕭疎
風采熠燿衣襜手翼無疾言遽色薄書填委公檄交馳
泰然若無事待下有恩雖盛怒不一撲少頗嗜飲中年

痛自節抑每以沈涵為戒常談皆菽粟之味聽者不厭
歲饑平糶不乘時射利為低昂敦意氣重然諾所為磊磊
落落無一不可對人言不求愧人而人自愧不求勝人
而人自不能勝或有非義曉以不可事或非便必力沮
以安善良為人排難解紛而不以為德一二郡侯甚嚴
明見之必禮敬稱為善人子練達周務孫警敏樂學身
後其無憾矣儒學提舉同郡龍人夫記其書室而曰盤
盤碩碩為家令子冲冲雖雖為鄉令士亦知居士者云

銘曰

斯人之懿斯罷之異斯銘之識斯則之眎

吳叔升墓誌銘

至元丙戌余始與吳東子叔震友其幼弟順子甫十歲
餘就傳讀書巍然如成人余及見其冠及見其昏及見
其有子及見其教子能成才又及見其卒且葬烏乎悽
矣順子字叔升自幼端重恭謹事親從兄動循禮度言
行表裏相應襟懷坦易恥為機巧神情散逸與物無競

生至元丙子五月季旬之七卒泰定乙丑十一月仲旬
之五丁卯九月丙申葬崇賢鄉之大塘其先宋紹興甲
子貢士珏特奏名入官子贊贈朝散大夫朝散生乾道
己丑進士榮仕至奉直大夫江東制置安撫司參議奉
直生紹熙甲子貢士發藻貢士生從事郎吉州永新縣
丞焱免文解登嘉熙戊戌第是為祖忠翊郎御前諸軍
都統司主管機宜文字因孫是為考妣鄒氏無子繼妣
徐氏所生也縣南鄒景元壻之五男二女長兄東子歸

附初授將仕佐郎主永春縣簿嘗以家之書樓作明新
義塾其後屋者摧壓鳳山之陽山水奇秀擬于其地建
塾以嗣兄志未及為而卒嗚呼順子三兄不四十年其
長兄逝次兄逝順子年及五十又逝惟一兄曾任儒學教諭者
尚存昔韓子志馬少監墓以人久不死而觀此世為悲
今余之於順子亦然其子也其孫也銘曰
命也在天莫窺其然徵之人事有子可俟

金溪吳昌文墓誌銘

幾悶絕從兄善往迎柩丙申以塋至宗族賓客哭極哀
數百里內皆傷歎蓋其天資純厚精敏童時不同羣兒
嬉狎進士業既通及吾門問古大學之道志在為善士
喜吳興趙承旨孟頫書模寫忘寢食宛然得其風致作
近體詩溫雅華麗事父母至孝與人交未嘗忤人雖燭
見姦慝口終不言或託以事必盡心竭誠生大德辛丑
十月年廿六而終居延福鄉之吳塘大父可孫宋咸淳
甲戌進士迪功郎新昌尉至元中授將仕佐郎建昌路

儒學教授父晉卿世世積善鄉里稱為篤行之家有子
賢而不壽天道殆不可知娶穀城簿朱彥才女生一男
二女男始十歲余之哀之也如親子姓余之三孫與共
處國學者哀之如親兄弟焉其妻之兄鄉貢進士朱夏
狀其行而曰較之德儉年多者此曷為短彼曷為長也
邪嗚呼此昌黎韓子所以銘李觀施之昌文為宜昌文
斐字也銘曰冉而疾顏而夭謂天昭昭胡斯杳杳

故梅堃逸士劉君墓誌銘

故丞相廬陵文公嘗寫卷舒堂三大字貽其鄉之隱君
子劉氏筆勢雄偉廣脩文餘劉寶藏之其嗣肖翁敞前
規揭舊扁不遠數百里遣人持文公真蹟造吾廬余嘉
其孝為作堂記越數年肖翁之子以麟致書曰亡考辱
先生記其堂矣不幸大故將卜月日以葬敢乞一言志
諸墓余昔者固嘉肖翁之孝今也以麟之孝如其考惡
得不諾其請哉劉自素之分宜徙傳十餘世至振道字
子明志氣慷慨交四方賢士大夫文公為書堂扁者也

肖翁其次子名夢說博誦強記經史諸書貫穿通暢翰墨尤工婉愉事親左右服勤罔或遺親憂素善鼓琴父之燕座曰琴牖其扁章丞相鑑所書延客其間父命操古調聽者咸喜父既沒偶至琴牖必潸然隕涕終身為之廢琴養母田夫人堂名春暉未幾母亦喪讀孟東野詩輒嗚咽痛絕與伯兄同爨三十餘年雖睦如一日兄逝哀戚劇甚凡父所營創莫不繼述充拓堂西建重樓藏書數千卷首自點校籤帙整整前代所存古器奇玩法

書名畫寓意收貯資質甚端毅言動典刑遇事正辭無
所阿徇里有靈祠廟圯弗治歲旱禱雨未應焚香祝曰
惟爾明神久食茲土幸速作霖以蘇民望有頃大雨首
倡衆力一新其廟平時希入城市府公邑長待以賓禮
未嘗私有所干安福州官范侯益民廉吏第一敬慕身
教家法之嚴以女妻其子往時廬學士摯將旨祀南海
解后一見特加罷重問其名若字因曰傳巖之肖宜為
和羹之梅乃錫梅堊二字以號繇是種梅結亭稱梅堊

逸士幅巾鶴氅游息亭中雅歌投壺枰弈茗飲與賓客
賡酬為樂酒酣興適浩歌東坡治生不求富讀書不求
官譬如飲杯醉陶然有餘歡之句拊掌擊節殆不知世
間有榮辱事撝謙自牧好學友善耆德先達名人勝流
相與如伯仲故見聞識趣歲長月異漸潤熏染於其子
亦日益焉泰定丙寅子以麟往應進士舉最之曰吾祖
父以儒為世家吾從兄以名達禮部汝其勉旃八月初
瘍生於背雖謹視醫藥然別墅從容賓客談笑一如無

病時是月二十九日終享年五十四娶王氏先三十年卒繼張氏縣尉某之女縣尹某之孫也子男二以麟以立俱張出女三長適吳次許適王幼在室張櫟之狀謂翁翁好義好禮保其清福有詩書園林之娛其生也人樂與游其沒也傷嗟之不已所惜學未及設施名未至光顯懷才抱器死於中天可哀也陰有德者必食其報不在其身在其子孫劉氏世有隱德其來遠矣其後又何可量哉斯言蓋足徵云銘曰

韜卷經綸以隱以淪漫漫知津疇詘疇信不降其志不辱其身古之逸民與

故鄔夫人周氏墓誌

夫人周氏樂安鄔君孟時之妻仁傑之母也仁傑為余言鄔氏自五代時居天授鄉甘泉里之河山族屬蕃衍經宋三百年號著姓至元丙子以來軍寇交擾靡有寧歲壬午冬先君奉親避地豐城之竟明年春彼地寇作吾家亦罹其毒而先君沒焉先妣抱諸孤依外氏而處

嘗謂仁傑曰汝父才志不在人下實為家督相爾祖樹
立門戶諸叔蒙業而安咸淳癸酉汝仲父龍從與貢汝
父慨然以儒效自期未幾歷改科廢又不幸早世汝能
勉學繼先志乎事變僅定去外氏復歸故里吾母劬勞
二十載畢男女昏嫁一家子孫四十餘人養志盡歡乃
潛然涕泣曰吾與汝得脫喪亂之禍享康寧之福猶有
淺土之喪盍亟謀葬既葬又曰昔張圓遇盜以死其妻
能求文人志墓俾死者名永長存而不悼其不幸於帝

吾老且病弗果謀汝輩獨不念及此乎逮病革又曰吾年二十歸汝家汝父年四十四而死其時汝七歲汝弟三歲幼弟甫歲今幸未墜先緒吾死必乞銘以表汝父之墓以成吾志言既涕泣不自已明日遂終先君諱龍啟生宋淳祐庚子九月壬申卒元癸未三月丁卯延祐庚申正月戊子遷葬里之大山先妣諱柔恭生宋寶祐癸丑七月丙午卒泰定甲子九月丁亥越四年丁卯十二月壬申葬里之蔡家原仁傑未能立身顯親吾母遺

教其敢忘失謹承先母志以墓石之文為請先生閱其
情而畀之銘不惟生者可逭子責於昭昭抑使死者可
無遺憾於冥冥也曩余未壯已聞府君之父宜伯諱誼
富盛而尚文表表為名家比壯又識夫人之父叔器諱
治敦樸而不華與余相厚善夫人以周長女為鄔家婦
承厄難之餘克勤克儉以中興其家哀傷夫君圖壽其
名於身後嗚呼賢矣哉志夫人之葬因以著府君之名
庶其慰愜貞妻孝子之心乎系曰夫人府君同鄉懷仁

里人三男仁傑仁俊士佐中男為季父後一女適崇仁
鄭桂孫男十一女八曾孫男五女六余之孫當夫人孫
壻也是為銘

袁弘道妻陳氏墓誌銘

吾里陳居士庾夫婦皆善人四男三女其中女幼慧生
宋寶祐戊午十一月八日元至元壬午歸於同鄉袁弘
道君舅夙喪事君姑甚謹夫家富而文當時務紛紜世
業分析之後儉勤相夫以長裕其家比近兄弟而處凡七

載大德丁酉冬從夫復還故里貲產日闕為里中之甲
治內有法遇下有恩待賓客有禮居士之家漸不如昔
弟姪來依者衣食之冠昏之經紀顧視終始如一延師
教子孫俾克紹先志里有貧病者樂周之至元己酉構
新宅而居延祐己未正月十五日以疾終夫悲失助子
哀失母弟姪之依焉者賓客之過焉者莫不悵然思其
德泰定丁卯十一月戊寅葬查坑溪南夫為請銘子時
敏娶黃娶陳時敞娶游時孜娶吳孫男濟泰光明昭志

孫女六長適李五在室陳居士暨弘道諸父於余為異
姓伯叔父行故不辭其請而銘銘曰

婦人之善不著於外不聞於人猗與良士得此良嬪

樂安徐明可墓誌銘

樂安徐昭明可服親之喪既練泰定丙寅二月乙酉以
疾終明年丁卯十月丙申將葬縣前之碧隴谷孤子炳
哀泣請志其葬按樂安徐氏先世自臨川之下麓徙昭
之大父諱通字泰甫軒岸個儻意氣出羣宋末以庶

人在官前後邑令人品雖不一率皆偉其才器喜親士大夫亦樂與交其門常多嘉客國朝初定南土郡牧檄攝邑尉新官待之如弟兄時舊民未嫻新政貴者乍失其貴富者不保其富偃偃無所依倚一邑四鄉之人晨夕奔趨席其庇燾消患解紛人之賴以安全奚啻千百聲譽洋溢貲產彌厚豪俠不嗇日食千指四方游士伎術襟流填咽而至各滿所欲去至元己丑九月卒蒙惠者追思之大母陳氏年九十猶康強善飯父儀字士儀

習進士程文宋亡科廢不獲試晚好老佛書泰定乙丑
正月卒昭生三歲喪其母陳比長從詩師學詩吟咏可
傳貢舉新制行亦能其業而壽不永暨從弟尚俱及吾
門娶何男一人炳也女五人適邱適王一許適黃二在
室徐氏三世挺然自拔於儔類中昭年僅四十四大父
年止五十四獨其父得年六十九而父子相繼以歿為
可悲也銘曰

猗嗟一門前祖後孫有惠濟人有志顯親惠未及浚

志未及伸而遽隕身其可嘖呻

宜春易君妻劉氏墓志

故易處士妻劉氏淑新其名系出安成之族年十九歸
易二十四喪夫一男甫五歲一女甫二歲奉養舅姑沒
而終其喪葬鞠育子女長而畢其昏嫁禮教各無闕違
和妯娌睦族婣善比鄰恤患難撫孤幼俱有藹然之仁
予既室傳家事專意道釋二教每日誦經寒暑不輟年
未六十及見曾孫六十三得微疾越八日盥頰而坐命

人誦金剛經于側聽至如夢幻泡影如露亦如電而逝
泰定丙寅十一月十九日也明年某月日葬里之黃熊
原子震為儒謹愿篤實請志其母之墓余謂而母發居
四十年有婦德又能理家上孝下慈外雍內慧貞婦也
賢母也女妙吳適駱先卒孫男一曾孫男一是為志

故撫城吳居士墓誌銘

吾家與居士交游四十五年如一日年七十七得末疾
艱步履越三年余赴闕過郡至其家猶能扶拽出見又

五年年八十三而終其孤請為銘墓噫余其何能無慨然也哉居士諱德新字鼎之世居撫城西門之內直郡治之北事親善幾諫事兄篤恭兄卒于家卜宅兆而安厝之撫其遺孤如己出為之冠笄昏嫁各擇一業以終其身故人子不自振量力資給可教者教之底于成濟親舊鄰里之貧有貸未嘗計息衣其寒食其饑疾不能醫者助藥費死不能葬者助葬費諱言人過苟可告語必責善以成其美拯救急難或有爭訟曉以理法片言

解紛一出公是非靡不心服繇是諸鄉諸邑望族巨室咸造其門科舉興教二孫以取應每日曉鐘動即起焚香誦梵典自少至老不輟至治辛酉春疾泰定丁卯秋劇七月二十二日脩然而逝其生在宋淳祐乙巳十二月二十五日娶黃繼姜皆先卒子男一文炳女三其一適詹其二其三適張孫男二女一曾孫男三女二卒之年九月某日葬臨川縣招賢鄉之德坊噫居士敦謹人也與人有情與物無忤延祐乙卯充吉委吏吉大郡也

納米數十萬斛稟量平訖事無譁誠且才故也善書者
嘗扁其燕室曰實庵云銘曰

維慎維慤有厚無薄有善無惡交久不渝嗟哉已夫余
其銘諸

吳文正集卷八十三

欽定四庫全書

吳文正集卷八十四

元 吳澄 撰

墓誌銘

有元承直郎南康路推官蕭君墓誌銘

戊辰

延祐五年進士第八人蕭瀾初任同知唐州事奉其父就養秩將滿一從子偕其父相繼卒于官所累累然以喪歸既葬服除所知迫之同趨京且先為持河南省咨文以

往瀉憂患之餘趙趙其行黽俛就道僅一力自隨泰定二年春至汴疽作閏正月七日死旅邸子輻扶柩過舊治僚友吏民哀傷如其戚焉喪歸數月命下改授承直郎南康路推官其始仕唐州也長貳頗以書生易之見其行事心乃大服廉明之聲聞于當路嗚呼竟如是而止悲夫瀉字漢西臨江新喻人生至元癸未十月二十七日祖寘叔宋鄉貢進士父元善不仕娶伍氏子輻璋琇琇嗣兄後女子一許嫁而天四年十一月某日葬某處

余嘗校江西行省試士程文而溲與貢故其子輻走數
百里詣余請銘嗚呼余校文江西者再初科得蕭立夫
拜初命過死再科得蕭運不及拜再命又死昔既銘立
夫之葬今又為溲銘惡得而不悲也邪銘曰

人哉之天培之其諧也宜哉人扶之天摧之其乖也何
哉

故洞真處士周君墓誌銘

君諱鼎字德卿姓周氏廬陵人其先世自汴徙君生而

英偉倜儻不惟博覽羣書卓冠時彥又善說辭可馳騁
艱難膠轄之場年比壯宋祚訖危亡之際猶能效謀獻
計贊近關守禦之臣然屢顛非一木能支矣北來將相
喜君才辯君志在退處無復干進足迹半東南達官鉅
族人人青眼相看君亦不苟合所至輒主僻陋隱約之
家不輕出不汎交韜晦其才擅名一藝絲桐遺音悠然
嵇中散之趣所師蓋當代宗工而君之巧有若飛衛與
甘繩之射手法神縱幾獨步江右從學弟子常數十輩

餘力兼嗜醫經深探張仲景用藥意每歎庸醫誤人攝
傷寒論治法撰成歌訣明白縝密觀者易曉雖自處高
簡弗能低首下心為人治疾然醫流拾此足以悟疑辯
惑陰有活人之功焉老而倦游不遠適間造鄰郡訪舊
相知或留數月或及暮年清江彭氏尤所親厚泰定丁
卯客其館值初度劇飲朗吟樂甚越數日無疾而終十
二月九日也年八十三君之子聞訃而來彭已悉為經
紀終事輿論義之君娶太學進士沈君女子瑛瑾珣女

歸羅瑾珏俱為承天宮道士瑾先卒珏卜致和戊辰某
月日葬兆在臨江新淦善政鄉德集里之玉澗珏謂余
知其父請銘君自號大江翁夙慕清虛元教之宗又號
君洞真處士珏克踵家學銘曰

古之伯牙痛子期死今之子期欲伯牙生豈可得哉豈
可得哉嗚呼噫嘻

金溪余天麒妻吳氏墓誌銘

金溪名家故登仕郎吳君時可之長女懿純以姪從姑

歸為同里余天麒之配泰定丁卯七月戊午年六十四而終葬有期哀子城承父之命持舅之狀來為其母乞銘余嘗銘登仕夫人余氏之葬矣閱狀余母之賢一如吳母奉舅姑夫君處族姻待使命以至主饋饌賓靡不中禮蠶績女功躬服其勞雖家力彌裕不改常度姑疾逾年晨夕侍養左右憂不滿容父登仕君晚節風靡八載每月致藥饌每歲歸省問已嫁而孝不衰可謂賢已子男一城也女一媚倪大本孫男三女一致和戊辰九

月甲申葬白馬鄉之豹塘狀其女兄之行者登仕君之
叔子應子也銘曰

父也賢母也賢故其為女也賢而歸為人婦也亦然

故登仕郎高君妻艾氏墓誌銘

臨川高溥以其大父登仕君所撰大母艾氏夫人殯志
因其舅饒君心道來請銘登仕君諱一夔字帝臣艾夫
人諱良秀字德潤咸淳癸酉貢士性夫之女年十有四
歸于高六十有六而終延祐戊午冬也次年春殯于三

岐子男五可詒裕其四其五出為人後俱早卒孫男八
溥洪濬深某某某女七長適章餘未行夫人卒後一
年其季子卒又四年其伯子卒又四年其夫卒又一年
仲子亦卒諸孫將以泰定五年某月日葬於所殯之北
夫人生儒家有婦德中饋之職甚修尊卑長幼內外咸
雍睦事父孝已嫁如未嫁時其父貢士君晚節頗怏怏
失志日具壺觴就其寓地娛樂之死而喪之哀習見父
族得儒效每以勗其夫銘曰

一殯十年家禍連連今始克葬維孫之賢

故太學進士黃君妻徐氏墓誌銘

臨川黃君叔與太學名士直易代弗及成名諸子皆能
一日持其舅氏金谿縣主簿徐奇伯狀來為其母請銘
其狀曰奇伯女兄謹慧中凝重不妄言笑生淳祐丙午
五月癸酉歲淳癸酉歸黃治家有則動相警戒夫入太
學脫簪珥斧壓成劑貯布篋中以授且曰勿以舅姑晨
夕奉養為慮元至元戊寅君舅喪助夫喪祭舉中儀式

君姑多病扶掖盥櫛湯藥必嘗而後進訓兒子女鮮或
厲聲色處妯娌終始無間言服飾簡朴雖盛寒暑手不
離針線大德丙午得瘧疾每旦猶洩瀉七月己丑言語
如常時奄然而逝子男五純維約繼紬女四壻曾壻熊
壻王壻許孫男四奐岡肯德女四至大己酉八月殯君
姑墓左至治壬戌卜吉兆於盡安鄉之石牛堡首乾趾
巽將以年月日葬嗚呼余於太學君及其子約素厚善
銘其可辭乎銘曰

卷八十四
夫振文聲子抱時才克相克成噫賢矣哉

倪君立墓誌銘

與予同生淳祐己酉者日就凋落其存者相知有廣平程公相聞有上饒倪君延祐丙辰程公自翰林承旨以疾謁告歸是年冬倪君亦得疾如程次年丁巳春竟不起其孤介通山主簿鄧君希顏書以前太學進士余君鑰所狀君行來徵銘嗚呼予與君猶兄弟也君生九月朔後於予八月而先於予以歿能無悲乎遂不讓而銘

諸君諱南杰字君立先世銀青光祿大夫始居貴溪之
沂陽曾大父元大父灋從事郎武寧縣尉父應雲承信
郎汾海制置司議事官君天資特異書一覽即成誦工
進士詩賦侍制議君隸業象山書院山長黃侯器之咸
淳庚午秋貢與選待試國學提刑唐公特薦入官以養
親辭父既喪恭順二叔同門聚處無間言嫁遣二妹厚
資備禮無靳色堂構克繼先志宮講周公書南溪扁其
樓元宋之交羣情震蕩君內外調飭寧親以施於鄉鄰

當路勸誘以仕弗應至元辛巳省差徽州路學正紫陽
書院山長黽勉供職究朱陸異同捐俸以修黌舍士衆
悅服乃曰吾安為斗升之祿廢晨昏之養乎不俟官滿
歸養慈親年已五十孝慕如孺每一邱隴惻惻興哀子
能應門家事一不關心吟詠自適為佚老計尤樂佳山
水嘗游盱有夕陽影裏行人遠春鳥聲中歸興忙之句
繼游淞徧覽奇勝成詩一帙曰淞水漁歌臨清流建小
閣水光山色收拾靡遺暇日登臨蟬蛻塵氛埃壒之表

去家十里許原曰莊院隸撫金谿過而樂焉結庵其間
環植花卉曰吾將宅於是次孫如京戒勿久處甫及半
載又命促還先除夕三日至家則君已疾矣風淫于末
然精神炯如正月朔旦受家人慶禮如常至午索筆書
遺教一畀二孫勗以勤學一畀其子令喪祭從禮勿信
世俗薦拔等事越四日脩然而逝配金溪劉氏先十八
年卒男以忠女以適安仁上官鑒孫志文志學曾孫日
新曾孫女三君卒之明年戊午二月己未日遵治命葬

莊院銘曰

溫溫粹玉炳炳華燭如綺如縠如菽如粟乃如之人兮
未展而束我銘以昭之百世芳躅

故靜樂逸士黃君墓誌銘

故靜樂逸士黃君諱長元子仁其字也負英傑之氣倜
儻不羣往年初識予心異焉後嘗寓宿其家既而不相
聞垂二十載泰定甲子秋其季弟膺客死京華比其歸
骨予哀而誌之而君之子德華亦貽書為父請銘乙丑

冬予還自禁林丙寅春德華來溫前請君洪之豐城人
其先自長寧鄉新田徙劒池鄉散田考諱榮孫號桂岩
翁少與清江徐侍郎鄉孫友宋咸淳丁卯覃恩貢禮部
家素饒裕至元丙子以後民駭新令疇昔高門鉅室不
數年間淪為中下戶者比比甚則破滅靡有子遺君年
甫弱冠以家督膺門奮勵不少挫攝當紛紜膠輅之衝
衆縮手莫前若談笑從容處置一如故常不惟保守先
疇又能有所恢拓翁得養高肥遯一事不撓于懷承志

盡懽宗黨稱孝丁亥之春翁始厭世君弟兄三人各克振拔人謂難兄難弟貲產日進視世業不啻增十之八聲譽翕然賓客益盛由勤儉興而濟急周貧罔有靳色或犯禮義面折無隱挺特竊立不波隨流俗外似簡傲然於所尊敬雖為之執鞭忻忻如也撫接卑下惟恐弗逮豪悍挾勢必與之角理勝乃已最喜嚴陵方氏提起截斷二銘勒之於石佩服惟謹天資超邁書壹成誦終身不忘進士程文肆筆中度旦旦敦勗如科未廢延祐

甲寅貢舉制復率子弟應詔丙辰秋得痿痺疾明年丁巳猶力疾就試至治癸亥九月十八日竟以前疾弗起年六十三卜葬某鄉原配陳氏男德華理復德範女適熊某楊某孫成生明生壽生罔生熊壻後君一月卒理復先君九年卒俱無子以孽子麟生添生次孫明生為其後狀君行者胡氏紹初謂君才敏銳識通明力量足以治繁劇精神足以周細微好善結交急義勇為使得一命行其志必有可觀惜施于有政僅及一家胡與君

之考同輩年八十九矣其言信銘曰

猗嗟猷為卓犖瑰奇不弘其施而止於斯

故山南逸士曾君墓誌銘


嗚呼世未嘗無才也不用於世則其才不可得而見山南逸士曾君才之可用而不獲用者與君長子二歲子兄事之所居限一嶺相距十五里自幼相聚相知至老而君先逝矣子其能無悲乎君警敏倜儻年十二而孤已工進士詩賦才名自負富貴競羅致為子弟師中值

草運鄰寇蜂起逃難備嘗險艱黠猾並緣新政魚肉舊
民循常蹈故者往往家毀躬瘁君雍容其間抵巇如夷
匪但自庇又以庇人悉復早年所喪先業日進月益貴
浸以羸一族子一族孫合志扶樹人稱三曾云習俗頹
靡之餘儒族流風幸未泯絕三曾力也蓋君幹畧最優
忘年折行不相猜疑用克協濟議論明決機鋒捷出雖
諧謔嬉笑綽有雅韻士大夫官於斯客於斯聞聞見見
咸尊慕敬禮焉詩詞倡和竿牘來往若不經意而精神

飛動葩黻炳蔚可目可口令人喜悅無厭數時充君之材使小試一二或以文采著或以政績顯將無施不宜然終身成效僅僅一家一鄉而止嗚呼才之難士之不遇古今所共嘆予之謂君亦何能已於言哉銘曰

山南謂何號以地也逸士謂何士弗仕也鄙去邑為曾姓其氏也一元名叔仁字也考貢士夢薦諱也張氏妣也袁氏媿也復孺復參復可子也張洪董午壻也孫繁衍文三曾孫又生成生明生泰生四也孫女五已行一

未行曾孫女猶稚也居撫樂安鄉則忠義也墓南砦原
二十里而邇也生淳祐丁未日四月九也卒至治壬戌
日三月五也十月六日寔卒之歲也其寔之宅丙首壬
趾也誌之以章其美也銘之以繫于誌也



吳文正集卷八十四